

INUIT ATAQATIGIIT

INATSISARTUNI



Februar 2023

UPA2023/68

Inatsisartut Suleriaasianni § 33 naapertorlugu aalajangiiffigisassatut siunnersuut imattoq matumuuna saqqummiuppara:

Naalagaaffiit Peqatigiit Meeqqat pisinnaatitaaffii pillugit isumaqatigiissutaata malinneqarnissaanut iliuusissatut pilersaarummik 2023-mit 2030-mut atuuttussamik nutaamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Egaluk Høegh, Inuit Ataqatigiit)

Tunngavilersuut:

Naalagaaffiit Peqatigiit Meeqqat pisinnaatitaaffii pillugit isumaqatigiissutaata malinneqarnissaanut Naalakkersuisut iliuusissatut pilersaarutaat 2023-2030 ukiaq saqqummiunneqartoq, tassaaniarluarpoq nuna tamakkerlugu iliuusissatut pilersaarut.

Pilersaarut pillugu naalakkersuisunut §37 naapertorlugu apeqquteqarsimaninni imm. 222/2022-mi ersippoq – kommunalbestyrelsit borgmesterillu pilersaarutip suliarineqarnerani peqataatinneqarsimangitsut. Inatsisartuni ilaasortat – partiit – minnerunngitsumillu Ilaqutariinnermut Peqqissutsimullu Ataatsimiitaliami ilaasortat – aamma pilersaarutip suliarineqarani peqataatinneqarnikuunngillat.

Meeqqat illersuisuat pilersaarut pillugu qanorlu sanarfisaasimanera pillugu aamma isornartorsiusimavoq¹. Naatsumik oqaatigalugu MIO-p peqataatinneqarsimanertik

¹ [Meeqqat illersuisuata iliuusissatut pilersaarut isornartorsioraa: Angusagarluarnianngitsog ersarinngitsorlu | KNR](#)

INUIT ATAQATIGIIT

INATSISARTUNI



naammaginartinngilaat, kingusissukkullu aatsaat pilersaarutip iliusilersorneqareersimaleriartoq peqataatinneqarsimanertik uparuaatigivaat.

Allatut oqaatigalugu qitiusumit iliuutsit kisiisa aallaavigalugit pilersaarut suliarineqarsimavoq. Tamannalu isumaqarpunga kukkunerusoq annertooq.

Inuaqatigiittut ajornartorsiuterput meerartatta pisinnaatitaaffiinik innarliisarnerujussuaq – ukiorpassuarni annertoqisumik sumiginnarneqarsimasoq – annerusumik allanngortinneqassappat – tamaavitta immitsinnut pisussaaffil sortariaqalerpugut – isummagut siunnersuutissagullu qaqlersussallutigit – ataatsimillu ilusilersukkamik alloriaqqinnissarput sanarfiumallutigu.

Maani Nuummi januaarip 9-aniit 11-ata tungaanut *"Siunissami llaqtariit – toqqissisimasut, eqeersimaartut aamma asannittut"* qulequtaralugu isumasioqatigiisitsisoqarpoq.

Aaqqissuussamullu annertuumut peqataasut tassaapput kommuunini politikerit, nuna tamakkerlugu politikerit, kommuuninit tallimanit sulisut qitiulluinnartut, qitiusumik allaffeqarfiit, pisinnaatitaaffiit pillugit sullissiviit, NGO-t, ilisimatusartut, politiit, namminerlu piumassuseq malillugu suliniaqatigiiffiit.

Isumasioqatigiisitsinerup pingaarnertut siunertaraa isumaginninnermut suliassaqarfimmi pisortanit namminersortuniillu assigiinngitsunik suliallit akornanni suliniutaasut patajaallisarlugillu ineriertorteqqinnissaat.

Peqataasunit alloriarnissap tulliata suunera eqqarsaatigineqarpoq, isumasioqatigiinnissap tulliuttup pinnginnerani najukkami suliffimminni qanoq iliorsinnaanerlutik isumaliutersuutigaat.

Tamanna akuersarneqarsinnaanngilaq.

Soorunami taama annertutigisumik katersuuttoqassatillugu minnerpaamik aggerfik

INUIT ATAQATIGIIT

INATSISARTUNI



suugaluarpuunniit meeqqat pisinnaatitaaffii malinneqarnissaanut anguniakkat pillugit alloriarnissap tullissaanut siunnerfiginiakkat killiffissioreersimallugit – isumasioqatigiinnissap taama annertutigisup appakaaffiginninnerani pilersaarusiortoqareersimasussaagaluarpoq.

Allatut oqaatigalugu nuna tamakkerlugu pilersaarusiortoqarnissaa annertuumik amigaataasoq tassa aamma ersippoq, taamaammallu piffissanngorpoq suliassaq pineqartoq pillugu iluamik timitaliisoqarnissaa.

Taama tunngavilersuuteqarlunga Naalagaaffiit Peqatigiit meeqqat pisinnaatitaaffii pillugit isumaqatigiissutaata malinneqarnissaanut iliuusissatut pilersaarut 2023-imiit 2030-imut atuuttussap nutaamik suliarineqarnissaa pillugu Naalakkersuisut peqquneqassasut Inatsisartunut aalajangiiffigisassanngortitsivunga.

Inuit Ataqatigiinniit nutaamik pilersaarusiortoqarnissaa pillugu suliniaqqinnissatsinnut takorluugarput unaavoq:

Nunatta meeqqat pisinnaatitaaffiinut sullissivia, MIO, Naalagaaffiit Peqatigiit Meeqqat pillugit Isumaqatigiissutaa nunatsinni tamakkiisumik naammassineqarnissaa anguniagaraat.

Nuna tamakkerlugu pilersaarutip qanoq sanarfineqarnissaa MIO-kkut oqariartuutaat siullertut pingaarnertullu ataatsimiitsitaliamit tusarniaavagineqartariaqarput. Taakkulu oqariartuutaat suliniaqqinnissatsinnut aallaaviusariaqarput.

Taassumallu kingorna partiit Inatsisartuni issiaitaqartut tamakkerlugin – Naalakkersuisut peqatigalugit – Naalagaaffiit Peqatigiit meeqqat pisinnaatitaaffii pillugit isumaqatigiissutaata malinneqarnissaanut iliuusissatut pilersaarut nutaaq suliarineqartariaqarpoq.

Taassumunngalu atatillugu partiit tamalaat siunnersuutissaqassaqisut qularinngilarput. Kisianni matumanri annermik siunertaasoq tassaaneruvoq pilersaarusoqatigiinnissamut

INUIT ATAQATIGIIT

INATSISARTUNI



periarfissiisoqarnissaanik aqqutissiuussineq – meeqqat pisinnaatitaaffii pillugit malinnittoqartalernissaa tamatta akisussaaffigalugu kivitseqatigiinnerlu anersaaralugu ingerlatilerniassagatsigu.

Pisortanut aningaasatigut allaffissornikkullu kingunerisassai:

Siunnersuut Namminersorlutik Oqartussat iluani annerpaamik A/C siunnersortip ukioq ilivitsumik sulineratut 500.000 koruuninik naleqassaaq.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.